

摘藻堂四庫全書薈要

集部

欽定四庫全書薈要

集部

滄溟集卷

十九至
二十一

詳校官候補通政司經歷郭祚熾



欽定四庫全書薈要卷一萬七千一百四十二

集部

滄溟集卷十九

明 李攀龍 撰

記

太華山記



太華之山削成而四方其高五千仞其廣十里

盖指華中削成而四方者爾四方之外宮之盡華山也自縣南十里入谷逶迤上二十里抵削成北方壁下乃谷即西南出不可行行東北大雷中雷中一峽

裁容人左右穿受不滿足穿受手如決吻人上出如
自井中者千尺曰千尺峽北不至十步復得一峽百
尺人上出如前峽曰百尺峽則東南行厓往往如覆
敦出人穿其穹中行穹中穿其仄輪牙也厓絕為橋
者二所東北徑雲臺峯東南得大阪可千尺人從其
罅中躡銜上阪窮為棧五步顧見罅中如一耦之眦
新發諸耜矣罅中穿如峽中峽中銜如罅中峽中之
縞垂罅中之縞倚皆自汲也棧北得厓徑丈人仄行

於穿手在決吻中左右代相受踵二分垂在外足已
茹則齧膝也足已吐是以趾任身也北不至十步厓
乃東折得路尺許於厓剡中入並厓南行耳如屬垣
者二里剡窮復西出厓上行則積穿三丈有厓從北
來踰此厓上複高三丈自踰首南行厓如前剡中屬
耳甌耳矣三里而近為蒼龍領領廣尺有咫長五百
丈厓東西深數千仞人莫敢睨視是酈生所稱搦領
須騎行者矣雖今得拾級行哉足欲置之置先嘗一

足于級上置也然後更置一足其所置足猶若置入石中者猶人人不自固匍匐進也級窮得厓踰焉高二丈一隅西北出人從其隅上南一里得厓又盡礮不可以穿縹自汲也是皆所謂懸度矣不至百步西北冒大石出厓下西南上二里得松林五樹稱五將軍厓上者不見杪厓下者不見本從縣中望見松如樹莢也西一里有大石如百斛困不知何來客於此橫道而處踰之為穿徑二十所西南百步得巨靈掌掌在削成東北方

壁上不盡壁五丈許人不得至掌二丈許掌形覆其拇
北引如三尋之戟從縣中望見掌即五指叅差出壁上
也又西百步詣削成四方上矣西南望削成四方中東
北望所從上削成道道從東北隅出二十里是鐔于雲
臺峯猶杓之在斗矣削成上四方顧其中汙也上宮在
汙中西北玉井在上宮前五尺許水出於其上潛於其
下東北淫大坎中凡二十八所北注壁下壁下注道中
一穴北出水從上冪之也四壁之穴各在一搏上宮東

南上三里許得明星玉女祠含神霧稱明星玉女持玉漿乃祠在大石上大石長十丈許祠前輒拆拆下有穴穴有石如馬折南五丈坎如盆者五所如臼者一所水方澹澹也下從祠東南峽中行二里得池二所大如輪東南行三里望見衛叔卿之博臺在別巔為埒不盡厓尺中如砥可坐十人厓南北縞纒纒也欲度者先握縞自懸厓中乃跣厓自汰令就縞不得縞還跣厓自汰得而後釋所自懸縞也此即秦昭王使人施鉤梯處也西

南上三里許得一峽如括曰天門門西出為棧而銅柱
陘不能尺長二十丈棧窮穿井下三丈竅旁出復西行
為棧而銅柱一池在石室中不可涸也天門旁有臺如
叔卿之臺南望三公山三峯如食前之豆是白帝之所
觴百神也從上望壁下大谿谿肆無景即日中窈窕爾
久之山出其末若鏃矢頃即失之矣是為南峯南峯
前出南壁上東峯出東南隅壁上西峯出西北隅從下
望之五千仞一壁矣攀龍曰余既達削成四方中不復

知天不可升矣余夫善載腐肉朽骨者乎及俯三峯望中原見黃河從塞外來下窺太壑精氣之所出入又未嘗不爽然自失也

德王冊國記

先是宦者某給事東平府中侍今王蓋先懷世子幸之遂使為家令焉以屬今王懷王庶長晚為世子且卒矣懿王又薨房閹嬖臣各欲立所親倖以及時締主為已力取富貴論議洶洶今王岌岌殆也時御史李將臨懿

王喪見今王宦者某乃為王曰李御史且至必且曰雖
王儼然在憂服之中得國恒於斯矣王其辭焉孤孺子
以先王光靈得與於哭泣之哀以為使者憂孤不得共
承先世子之謂何或敢有他志以辱使者又一二叔父
先王之所愛也先世子之所友也無不大賢孤孺子何
敢因以為利其孰能說之某時屬召使擯亦言舍其孫
而立其子非先王意也乃奏入是歲冊今王矣是舉也
或有於御史處言王狀者及御史見王狀聽其言也又

自失矣藩王子孫生長閨牖不習見民間事不晉接賓客復幼冲氣識未及之安得不在左右也懷世子既卒所以為懿王後者未佩玉兆也今王又無外家強宗其府中事一切受懿王宮監裁抑訖如民家子養歲時不得朝懿王即朝亦遽去不得言某蓋甚微且初來濟南貧無外黨思顧先世子舊恩輒以私錢供給衣食教詩書相依倚護防它變傾身為之昔者晉獻公屬奚齊於荀息里克將為亂則謂息曰三怨將起秦晉輔之子

將何如是有以要息也其所欲汾陽之田百萬易與爾
使許而明焉誠得立然後謝不與汾陽邑而奪之權遂
以徇於國中豈為負先君言哉蒲城之事履鞮豈不念
之深其曰不敢以二心事君倍主則謂文公猶公子矣
然受於驪姬豈正哉欲以解前罪也為非有似蒲翟之
事者不可也脫文公於焚宮之難以犯呂卻之謀然事
以危焉由是而論宦者某則是能有履鞮之智而行以
苟息之忠時與才不論焉有足稱者矣

介石書院子游祠堂記

伯剛先生既先後捐田二百畝郡邑諸生矣尋又捐田一百畝建介石書院以祀言公子游其中而宋著作佐郎王公蘋明處士顧公愚從焉以系師承勸風俗也則唯是其身自有之哉始先生在給事中時上疏先帝廣曠蕩抑邪佞者五事忤旨謫居庸一日而直聲動天下家居論學師承所自在風俗所自起猶是未敢一日忘其黨也豈以今之為文學者乃吳於六藝視天下為蔚

然乎然文學於吳自文學子游始子游既學於中國歸而南北之學立前知洙泗之間斷斷如也而誰以易之唯是寧不贊春秋一辭弦歌武城必以所聞於孔子寧倦後焉行不由徑必以得之於澹臺滅明而懼夫其流異邪今之君子蓋傷之曰於六藝焉而吳視天下為蔚然於理奚當也孰與譚性命則稱天著功令則語聖之為快哉遂至如許長伯號其徒唐林輩以四科一堂之上避席危坐稱天語聖何顏閔之具也愈嚴為頌愈近

綿叢之戲不然持說相難顯門耀之帖括自愛謂道在
是所為六藝蔚然者舉以掩焉而吳乃猶是其為文學
微言以諷詩之為教弦歌之意乎子羽度江吳多劍術
之士未嘗無傳流斯異耳豈其微哉子游之為茲厚於
後世也豈其本之則無沾沾六藝而子思唱之孟軻和
之以附先君子之列乎必不然矣及觀信伯說上則獨以心
胡安國者學曰師承識曰世務然信伯說上則獨以心
學心學奚當於世務徒所聞於二程氏者具是即其主

所不欲卒不以奪其所聞於師而迂濶自嫌也見無非
道與學何必使自口出及易其所聞乃以其所欲此於
文學奚當焉原魯義不仕元執在我而已即質行如許
衡吳沈有不信者高皇帝大徵大儒嘗一詣京師歸
而伏思穿几凡數十年有可以得諸大儒信又不但在
我則亦何嘗論學也吾黨諸生居以蔚然於六藝出以
直聲動天下即田三百畝若固有之不素餐兮孰大於
是自孔子布衣養徒三千人而子游與之矣何以稱嗜

飲食偷儒燁事安得有君子固不用力之言而曰是子
游氏之賤儒乎此介石書院所為偃之室從以二君子
者卒所捐田之志也是為未敢一日忘其黨云爾信伯
蘋字原魯愚字原魯於先生為四世祖先生名某字伯
剛嘉靖壬辰進士也

青州兵備副使王君城顏神碑記

君既以璽書按察青齊諸郡縣即青齊諸郡縣治也則
之部請城籠水曰是淄萊新益之間一都會哉天不弔

百姓一二長吏怠於疆事俾一二不逞子弟揭竿如林而負固自喜以為父老憂四方亡命嘯而過市有業甑於篚中覆之利劍莫敢以發而釋擔一呼為皆制挺又安可誰何百數十年來冀氏姚氏九為倡亂殺我一二長吏之戍者以荼毒我百姓焚蕩我廬舍憊不畏明至令一妖女子三勤我王師翦滅此而後食惡在其按察青齊諸郡縣為也余不佞蓋未嘗一日忘之桴鼓之鳴如出宇下即於璽書又得臨龍水上以春秋耀吾軍士

豈其防民而暴之中野必曰疆場之事一彼一此棄命
廢職其若父老何我必不然不佞之業在蒸民之七章
矣中丞傅公謂御史段君曰以余觀於大夫才可使無
徵役百姓而義不可使衆為政夫固謂一人慮始而榮
施不可有也不然夫豈不知淄萊新益之間嗷嗷者以
時詘為解也大夫實云畏此璽書即有後事安可言勿
與知也曰昔在庚戌少司馬城潞水上抗虜乃天子有
錫命此自大夫家政吾二人將有賴焉以干城王室備

他盜無亦大夫按察青州諸郡縣外城數十豈謂是而
游津梁之上有難急也大夫實云勿更使父老失望於
我則君遂營焉曰是在不佞此一役耳何至言鉅萬吾
因石於山因灰於石雖降之天不可勝用矣豈猶不堅
而覆蕢為之其又令暴風雨潦以攻一日之費石城非
不倍於委土而十年為計一再築之後石城之費立盡
是使父老終歲率子弟而城已君乃屬之有司某等者
自三月至七月有司某等者乃以効於君筭纔官錢九

百餘緡而城高丈有尋方廣若干丈各門焉二水門出
南北城下因壑為池百姓忽自有之矣君以報成今中
丞某也攀龍弱冠時已聞一二長吏及彼中豪言城顏
文姜事且三十年此無他則長吏過自好欲無受勞民
傷財名不者大役難成恐中廢作者不任又不者如匪
行邁謀與衆為政耳如此必使城自地出然後可百數
十年來冀氏姚氏凡九倡亂一妖女子三勤王師亡論
所蕩焚即芻餉供億豈但可為十城然遂以棄之乃平

居則又不復作一錢事而曰吾已為儲帑餉供億於某所令足待變矣豈為計哉君名世貞字元美吳郡人少司馬名忬君其子云

新設寧武兵備道題名記

山西三關先是蓋止鴈門一兵備岢嵐兵備實協理之其於防秋尋加守巡冀寧二道嘉靖三十三年復以清軍屯田驛傳若守巡冀南河東諸道迭出而分區監督焉三十七年改鴈門為鴈平岢嵐為偏寧其五道監督

如故明年仍以偏寧為奇嵐兵備以偏老奇嵐河曲四
守備西路叅將老營遊擊地方兵馬屬之鴈平兵備仍
駐代州以廣武壯樓平刑三守備東路北樓太原叅將
地方兵馬屬之其八角利民神池寧武四守備中路叅
將地方兵馬則以設今道云從御史楊公美益之請也
惟是三關與大同相為表裏右衛水口等處直虜南窺
朔應諸州之道其於要害視三關有輔車之義即虜一
道出沒我得以所直道兵馬掌距踵襲而自相為應何

慮不及三關延袤乃至八百餘里而虜得以探疏數為
堅瑕揣薄厚為虛實時分時合雖漢兵如雷風安能八
百里趣利也惟是席國家廣大守在大同云爾時則鴈
門一道竒嵐一道協理之足矣然猶恃藩籬以撤閭閻
不知中彊者外益固之為謀周也亡何以二道為不足
加之守巡冀寧二道為四道復以四道為不足加之清
軍屯田驛傳若冀南河東諸道為七道三關凡八百里
而七道以臨之即有五叅將一遊擊十一守備亦惟鴈

門奇嵐二道相信而服習五道者非常所屬卒然不相
為用十羊九蕪猶之愈數而愈疏清軍屯田驛傳曠所
司存冀南河東棄所分署是盡山西而事三關委境內
而勤一圉猶之愈實而愈虛不知疏數以形明虛實以
繫制也注鴈門以鴈平注奇嵐以偏寧似矣不知十一
守備分地如石畫相交尺寸獨以八守備隸偏寧一道
亡論石隰諸州防河之役行兼坐累有妨簡書即虜一
出套便涉其境而停障積阻烽火優游已難為卒又況

仍以五道便宜掣肘糜費無益豈所謂明形而槩制乎
時已權生變已常存寧武之介於鴈門奇嵐之間亦猶
鴈門奇嵐之左右於寧武疆場之政雖力有餘不備非
其域雖勢有餘不守非其約非其域不闌出徼功非其
約不聲援為德辟耳目之於視聽不相假借然後可以
著官知之良而稱同心亦使朝廷得以責所不備以其
所備按所不守以其所守捷無倖賞挫無佚罰三關猶
一體也省冀寧若清軍者七道而為三以重司存養內

治境內不疲於奔命三分其八百里而勞逸均各可以
朝檄而暮集而齊一其指使凡五決策以設寧武道而
議始成如此豈偏見一時之利害不參邊大計始終者
右衛水口為虜必窺之道即中路叅將直之與大同兩
掖犄角相逐銜尾相隨厚集其氣是顧是限者非寧武
乎與偏頭鴈門翼擊而夾攻為常山蛇勢者非寧武乎
明形槩制以回視聽新旗鼓出繕入計為邊長老貽數
百年之利身自作始者非寧武乎形不自勝制不自舉

沈公所謂其人哉首至者未幾論罷繼至者尋以遷行
沈公明形槩制三年於此矣乃少司馬萬公某獨以少
方伯奏留之豈不曰分地不量形與無地同量形不善
制與無形同善制不得人與無制同得人不久任與無
人同是二公者先後奏請蓋相足焉可謂同心謀國重
惟沈公之賢適與設會也因具列之使後之君子得以
觀寧武道所繇立者蓋以其人如此云

厯城張公德政碑記

濟南郡隸省歷城以一縣附其地所供億轉置送迎舉以取集郡大夫以上暨有事境土者令咸賓下之歷多山磽瘠水則陂圩一值荒歲不有恒產公至比災厲且邊圉嚴師旅在外急催科如捕亡淄青持戟之士日肩摩就募道路使者相望疲命於簡書凡期月公循循各如績一若不欲有為以是民亦安之雖小利不見也邑舊以律占租役必先以簿正常與它沃壤地偕田瘠歲腴屢不較邑墟亡不比屋焉公始第坵畝履原隰視土

之蠹惡以登下其賦勿一以收責俾參稽各無失職請
額著地沃壤不得欺謾避課邑百姓始不惡磽瘠陂圩
而汙萊為子孫憂郡大夫以上蒞我待需有事境土之
臣絡繹於邸宇晨趨出謁暮而不能更適庭供億轉置
送迎異求同費舊一以委諸編戶歲數十家以分聽其
給終則以貨賄之入出會之官契常不掩籍十登其六
七邑百姓無不若相與赴戮得代則若解懸顧以就社
席為幸而不知其產蕩然矣戶戶轉趨傾覆以積倉為

累不饑為諱蜡臘相祈庶幾無斯役弘治間加緡八百金民車至百二十乘正德以還加緡至二千三百金灤清之塗罕轂擊矣先南陽朱公首平筭事列諸兄弟之邑得裁五百金而邑人稍受賜即猶稱貸出納也公實始定吏會之議使度支在官工賈無以乘緩急侵傷農坐屈其利有司治之不遽上計則什器儲侍得轉相為用冗壞即移置勿有廢棄焉法甚便以約不復舉長物責邑人值而橋索所羨餘五六年敝政一朝嘉與百

姓日新邑不重困共正易輯市野喁喁庶見弘治之舊
郡大夫以上令夙以分禮下之而公不以卑百姓晝日
晉接不遑暇食而儀愈安未嘗飾厨傳稱過使客疲民
以取譽常夜折訟得情皆片言及疊疊問疾苦必竟辭
嘗語余曰吾四載於縣署有未蹈之跡未嘗一日於窮
閭忘兼照之心月旦與諸弟子設俎豆言詩書士再適
薦者七人其在生齒繁殖流移究宅嚮附者行負版焉
曰午秋入上最天官會徵書留擢西臺邑長老屬余記

之余惟君子之從政無樂乎悅人於始而終無以厭其
意也民豈惟無思公屬災厲邊圉之餘輕徭薄賦與民
休息知時務之要安以本俗使百姓培氣歸德恃以不
偷則君子之政哉公名淑勵太原之孟人辛丑進士其
詳具恤民錄云

厯邑岱畝絲枲則賦維漑沮洳汙萊迴錯昭茲海藩我
庸景附凡百執事咸襄侯度租役薦繁凋瘵罔籲汙可
以康無艱國步公始蒞止霓望方殷維時多罹百務孔

焚疲夫載路壑有轉瘠矢解倒懸登之衽席遊及引割
恢乎為紀渾兮以容內諳臧否期被允濟懲茲勵已雖
貫則仍弗憚改為雖遷善急慮動若疑襲弊未祛善將
安施乃第坵畝蠲惡是甄磽田沃稅比屋以新欺謾避
課靡郡匪民原隰以清井地用均澤及子孫世業莫湮
一都之會既詒我肄絡繹齊郊戟人節使供億送迎入
境取遂束秸不修王章斯墜編戶轉給趨相告匱疾首
赴役積倉為累吏畏其威南陽朱季平筭列邦我獲受

賜張公為政樂不可支曰茲出納實存有司矜此赤子
勿違農時什器儲備來工肆成杪歲上計昔縮今贏享
有公牢覲無私幣用克有經供匪無藝百年蠹政一朝
自替市野喁喁庶新多制晝日晉接夜分折獄民所疾
苦必盡忠告四載官邸窺園無跡兼照窮閭幽光潛晰
寄命百里視諸一堂童孺知名擬之龔黃謹庠申義父
母爾師變彼七士鴻漸于逵九戩有歌公歸無所稱最
銓階揚績當宁栢臺繡裳其忘東土蔽芾甘棠受天之

祐不朽者仁以報名杜

歷城令賈君記

蓋聞之為邑非不用民而能不輕用其民之為用也民亦孰能不用上而唯即安之為用也公既治歷城踰年而使者及於絳則其家大人就養焉居無何輒駕而返請留弗許請命之則謂公曰始吾之視爾於斯役相隸茲相承也唯是百姓兆民焉是出而為之令以賦諸其間俾各有藝極以務蓄其力無失其徵會民聽不惑而

後用之有司者豈有賴焉百姓兆民惟正是供而令無
即於隳政足以取給王事而已豈敢為是匪經以侈厥
度亦唯是役亦唯是益功令典籍輕重布之爾敢何異
之有即有豐歟不庭不虞之患爾既已錯而宜之使各
有懷生之念而百姓兆民實欲焉百姓兆民欲焉而諸
長吏孰不欲也若不佞總總焉唯不獲乎上是恐而勤
百姓兆民庶幾諸長吏以有德於我不則自恃其不欲
而曰諸長吏實欲之以委之無可奈何其君子實應且

憎以非我寧謝不敏敝邑豈敢有愛也上失其道民散
久矣子實生我而浚我以生乎而以德於上令實有民
而委之諸長吏其謂令何其無乃撤其寧宇而剪為逋
逃以自棄其衆百姓兆民將望望然挺險而走其轉於
溝壑何辭之與有若由是相為臨長自顯庸也尚將惴
焉有不敢輕用之心而使於我焉是息大衆其未可棄
也人亦孰能不用上而唯安是即我既已父母子弟將
自至我之不欲人孰不知猶之曰凡以安我也既以藝

極則浸漁不行而貧者勸役蓋嚮然於我有各相為用之心其朝夕在庭何辱命焉不佞在此猶尚逋逃人不懷生又從而徵之累焉而使即事於繫其若父老何何邑之為也若不然我去而反其田里爾安能知之今吾之視爾於斯不困於役不置於蒞也而邑由以舉安百姓兆民無能為逋逃之故也豈徒爾與有榮施乃歸絳蓋公為厯城者盡善政也而其要則有所不欲矣而才足用民才足用民矣而惴焉不敢有輕焉之心其家大

人見邑之無逋逃也而知其政君子哉邑諸進士郭子輩相與聞其言而賢焉各矢歌以詠其事而屬余以記者如此

劉公樂峴亭記

公既在襄陽諸生間不樂也已乃謂御史君曰昔爾先大父之除新鄭雖介然一王官之大邑丞乎固周室之未成子也豈其事長而我伐伎以馮人豈其行意而人稱功以加我蓋三載人莫之知矣人情不能樂其所不

安不能得於其所不樂我始慨然慕羊叔子杜元凱之
為人今亡論其位即其功懸諸所遇如此其難也不得
乎丞將求乎身孰與不得乎身將求乎子也獨如嚮之
人哉吾所為營峴者以若效爾大父於不窮而吾將老
焉以是為樂耳方叔子建平吳之議欲引梁益之兵水
陸俱下荆楚之衆進逼江陵平南豫州直指夏口徐揚
青兗徑詣秣陵巴漢奇兵出其不斥卒如所言何策之
明也元凱既激湟涇諸水以浸南陽諸田萬餘頃遂開

陽口起夏水達巴陵千餘里以瀉長江之險而通零桂
之漕民到於今利之何計之遠也是皆踪跡之所往來
精神之所暢悅山川之所動盪勲業之所肇造策之所
為明計之所為遠以是得於峴而後世誦義不忘猶我
視若於此者若能無意二子於此乎今天下南有所防
北有所備芻粟膠滯飛輓經絕此亦羊杜一時今何以
明策遠計入告我后而無勤諸執政乎即使持節監南
與北諸軍事不者大興卒治河若以使者行水惟是南

北交檄力百倍吳畫何所出何以係尉它伏中行而笞
之背縣官之費歲且鉅萬乾溢不常仰給遂詘湮消零
桂不啻涓委今何以使芻粟相屬千里坐至以無為諸
執事憂吾非其峴之謂夫固謂二君子之嘗至於峴也
不然夫豈不知鹿門之可以老也二君子得此於峴若
得二君子於國家而吾以得峴於若吾何為不樂哉杖
屨不具眺望不適談詠不揚飲酒不歡琴瑟不鳴俎豆
不大吾之事也吾何以知若能為羊叔子杜元凱與不

能哉彼且曰百歲後魂魄猶登此山也未嘗不流涕於
斯人陵谷功名相為變遷彼且奚以二石為矣此其辯
在詹何之說子牟也不得乎丞求之乎身既得乎身推
之乎子公之所為自勝者婉矣為峴而樂庶乎縱之又
何害乎心居魏闕之下也預嘗自謂武非其功祐蓋曰
疏廣我師也出處之間古人難之慕叔子元凱之功而
猶不忘鴻鵠龜鼉之諭余於是知公不言而有以自與
焉蓋曰夫豈不知鹿門之可以老也然不於鹿門而於

峴也則托龐公於二君子矣

重修肥城縣孝里鋪記

按察使周公為叅政時出督部過肥城縣孝里鋪鋪在縣西北七十里孝堂山下矣公慨然顧今縣令錢君曰此非漢孝子郭巨之所以葬其母者乎君子徘徊而不忍去也今且廢矣無乃先大夫若諸有司之為盟主也崇大茲館以為諸大夫有司之所憇而賓客使者之所假道乎今且廢矣何以崇大如公寢也屬在敝邑其若

諸大夫有司若賓客使者之辱在不佞何無乃逢執事
之不間而未得繕葺將肥之福小介於長清平陰之間
而曰疆場之邑一彼一此何常之有也而援以自解四
十年於茲假道者暴露憇者舍於隸人驅之不顧何以
徘徊孝子而觀采風俗疆場之邑在彼猶在此矣敢請
執事將何所命之乃錢君謝不敏已報上既得可自七
月至於九月而鋪成視先大夫請有司所崇大如公寢
者益虔矣以憇諸大夫有司以假道賓客使者膳宰致

餐餼者為導長清趨而南平陰徂而東交授互勞望孝里而歸之視遠如邇非先大夫諸有司之為盟主業孰與之是役也門屬之門堂屬之堂其个相偶其序相翼備矣而猶是鋪也能無廢矣先王之教在焉而敢以為功無亦曰二邑之蒿菰自愛曾不遣一斲者蹠鏤又何執事之不間矣錢君既修縣城稱保障而并及是鋪承蔽芾之休俾居者無警行者相勸以體周公廣施德於三邑者也周公蜀人名某錢君吳人名某

肥城縣修城碑記銘

漢書泰山郡有肥城縣應劭曰肥子國也城圍六里一百步高一丈五尺云蓋巖邑也五嶺盤其北陶山據其西視郡城為外屏焉國家分十戶所守禦其間念至深矣然而覆土耳先是邑令萬君則行築分東南北隅延石而堞之守禦者率疲卒晝夜謹斥堠省樓櫓無遺力而西一隅竟以先勞中廢夫城盛也一隅之隙全邑任之何彼此也在昔陶山之役動勤王師今安可使從高

臨下而窺以不逞之心無論五嶺之為踰備矣邑人大
中丞李公蓋嘗憂之謂今令吳江錢君曰此焉不延石
而堞之即三面雖金湯無益也又何必環而攻之屬按
察使周公先以叅政行部過肥子亦以為言而錢君則
慮事授司徒量功命日畧基趾分財用具餽糧三月而
集不愆於素堞凡若干所為雉若干云攀龍曰肥有陶
山之役余蓋猶及見之邑中丞自父母之邦守不為小
按察使周公慎其四境云爾而肥是城有味乎王公設

險之義乎與其動勤王師也寧短垣是圖覆土而土堞
之如塗塗附天之陰雨亟潰亟暝孰若延石之永逸也
是攝守禦而徵餘自帑政則錢君欲發與民而已而肥
是城則依物而偶於政肥之所以有成城也周公名某
錢君名某中丞公名某云銘曰

天不可升地險丘陵維休維戚肇自中丞周公居東于
宣于藩匪除于庭而力于原有令知發大物是憑綢繆
牖戶百堵斯興言售厥謀用在不疑匪良執事一簣之

虧卓彼巖邑何幹何楨三人同心乃成此城

內丘縣學田記

邑何學以羣士也學何田以羣士於禮也士相觀以羣而廢禮由羣邪也今豈徒俎豆之義始諸飲食彼見室家之樂則戚於為曠繄裡不掩則其額泚曰吾何有於為士也風俗之道士為政今尚何敢謂無恒產有恒心唯彼為能之即業已羣使日昞昞焉佔畢亡他技又何可使不有於為士也余往按部內丘至民間所謂漢孝

子郭巨里中里中即以所掘黃金事名矣嗚呼曩令巨時能自託於士何至欲殺其子以食母為孝也今又何敢謂內丘之無能為巨者則是田也無常歲有常賦其士足計也匍匐有喪不與其易與其禮婚姻之故不與其富與其禮而又為之宴喜於飲食周旋於俎豆使相媮快於為士則虞芮所棄而西伯以善養老者也是田也凡八區東南北壇地各十二畝邑厲壇地一畝南四里鋪地七十畝南宋家鋪地八十畝東四里鋪地十八

畝中丘驛地四畝凡二百五畝余始按圖得之既乃過
郭巨里中思夫士不可一日廢禮也乃命以為學田而
具諸籍中

張氏瑞芝堂記

援神契曰王者得志於地則華萃盛也漢在元封芝生
甘泉宮帝作齊房之歌以薦郊廟則得人若董仲舒鄭
當時輩儒雅推賢肩踵在列以奉天下實稱治洽所謂
九莖連葉回復此都植才之應也秦人蔓瓜谷之禍綺

夏之徒有伯夷之餓於商山之下與薇自療思唐虞不
蒙甚大之憂則碩人之邁矣夫芝玄氣之精也因腐朽
而暢靈華感則萌之矣奚愛甘泉商山哉張子其先中
丞公嘗以言事忤逆瑾意三挫之不偃也奸蕪既難風
紀茂遂乃以指佞見知於朝皆謂人中有屈軼焉豐本
遠條世麗東土祖孫奕葉棧樸之英十人每兄弟咏集
詠詠之盛出則衣冠曄曄第道士林榮之冲和漸於家
而以華國則人瑞者乎嘉靖丁未春芝產子含之堂者

五以示余而屬之記余見若卿裔矣若車蓋矣丹章而
紺理其葩云以弓矢嗟乎是不可與岐麥玄黍龜祥鹿
瑞蕃育靈囿以光騶虞之化乎即不欲宮童効異又何
限崔嵬逶迤之地則中丞公之後興乎子含慕先人芳
烈國香自與隱見之間矣聖天子方肇玄禋綏明賜天
下日濡旱麓之教賢才敷發芳躅盈庭芝則有哉中丞
公於子含曾大父行也堂構哀矣澤欲翦矣藜藿登卿
相遺蓬華一畝之宮子孫荒圯欲不守者屢矣子含慨

然以在我有豐芑之謀出私苴以肯世業煥然若見祖宗草茅之舊讀書其堂上以振簪紱之餘響人以知有中丞宅而謂中丞之世將復也乃子舍之堂有芝是中丞之土未敝而我聖天子至德及遠矣可無記哉

棗強縣劉村新建三官廟記

劉君雅棗強劉村人村東南去邑三十五里稱劉村以族姓焉村東南五里龍泉寺劉東父某所建也劉君所建其北則某祠又北則某祠又西北則某祠劉君嘗游

於田矣即民間疾苦察眉而藥餌起之葬者匍匐衾紼
婚者拮据羔鴈也夏月孔暎行者道暍河朔諸郡卒戍
徒役瓜期往代得及其塲圃以陰息其木下壺漿餓莩
厨傳過使轉相誦慕視廬舍如歸矣以社以方穀臧農
慶告成地利介言景福捍禦蓄患載在秩典歲時伏臘
我乃於三數祠集饗髦艾作敏主伯以輯鄉井以聯宗
黨以固守望之好杜侮予之禍豈為淫祀哉棗強當燕
趙之郊諸郡之卒戍徒役交雜於路悲歌少年慷慨相

向即加饑饉必多暴子弟何可無寔烈之風也同舟而
濟江海者覆於其各有一壺之心何者失衆之形也劉
君為一閭右家令諸郡卒徒視廬舍如歸矣即流移逋
逃操戈不逞又何可後事而備乎是廟也劉君有以處
其中也有處其中則棲託之迹重而流移逋逃欲為不
逞者沮於嫌忌之勢矣

滄溟集卷十九

欽定四庫全書薈要卷一萬七千一百四十三

集部

滄溟集卷二十

明 李攀龍 撰

傳

王中丞廷小傳

中丞初以大司徒主事有直聲聞於朝廷改監察御史以疏尚書鉉治大冢宰不奉職狀忤旨謫亳州稍徙崑山令崑山故相某視縣令家監爾即所欲令為之不欲屬之雖屬之公弗與為之故給事中某公不與為之矣

雖欲屬焉不能也兩人聞知各自失也相巨室大臣給事中雖廢然揣上意從私家祠有所祈不領於天子之祝官歲時聞上覬復收我者為之乃相與持一令短長何不至也公又守吳郡郡別駕某所治逋租者獄坐在戌籍當遣者六十人捕夫得者三百人公謂御史君曰異哉如以檄大司馬府中豈無令主伍吏望見籍而走乎戌者一人主送至戌所者二人捕未得者妻子一人捕者一人是千人之獄也御史乃寢之徐某者既以其

貲為太學生而復持其兄某陰事署而揭之途御史君
又以其署按其兄使在遣中公廉知其為署某陰事者
某也曰兄不義而穢於家弟不諱而播諸國其兄已髡
鉗對主伍吏某安得儼然因為利大冠若箕日沾沾
父老前也乃奪其太學生郡歲以籍錢九千緡市尚方
物輸少府而司寇某者其子欲之公不與也往求毘陵
郡錢六千緡與之已而給事中舉奏司寇免之並奪毘
陵郡與者官吳郡尚方物至今有司者市之遂為令自

公始也可謂不畏彊禦哉

霍長公傳

霍長公者西河人也既少孤而母太淑人李年二十餘歲以故失不為儒太淑人常恨之公曰往而不可還者親乎懸而不可知者祿乎昔在襁抱以有今日欲使不肖孤列鼎而祭先君子孰與竭力耕田之逮吾二人存也且為儒不成必難中棄而妨遷業孤豈不若諸生必以白首鄉校猶日呻佔如病嫗之就蓐焉是得毋匏瓜

畜之而進退維谷坐自朽腐亦惟從吾所好耳公由是
稍治產所致太淑人甘毳之餘亡何施予徧族黨矣無
何橋梁之役徧四境矣而產猶治也蓋公自計其力足
以供甘毳則推及施予不使有一日之積云公素坦率
煦濡與羣處然恥夸毘雖狎必以義無大小無敢忿爭
即忿爭曲直一聽公無後言者人以此益附公公既貴
有輿馬且年七十餘不以乘也每出入安步里閭中無
異布衣時曰吾幸未億庶幾與里門故舊遇諸塗何可

使其引避而轍迹畏人將無挾兒輩尊寵於車上儻哉
有司鄉飲酒公嘗一當大賓後輒謝不往曰吾始不圖
得從父母之邦見唐虞養老以燕饗甚盛典也一之為
冒而復抗禮邑長吏以煩官府僕僕起居乎公是時已
封御史進中丞少司馬凡三命故自謂將無於車上儻
云郭太淑人亦年七十以公之家而猶不輟麤糲之食
曰吾與君子同事李太淑人糟糠不饜若將終身雖今
暴貴七十餘矣何能異為婦時也豈以吾兒為不能事

我者乎其夫婦同德如此

贊曰史謂孔子數稱介山子然者豈之推之後邪晉之多賢由來遠矣子夏既居西河之上序詩教授所與友田子方段干木其人也霍長公家食不輟麤糲安步里閑不以輿馬非故讓也方在布衣時晨出夜入自以性之恒啜菽茹藿自以味之極一旦使之俟駕而後行式閭而後過苦矣品列而後御味備而後舉厭矣不然則一以抑損豈謂坦率乎西河之俗蓋猶有蟋蟀伐檀之

風焉其論為儒非獨疾夫不成也之推之母固曰身既
隱矣焉用文之然以有激將來使假儒之名以自好者
非効於世不得藉口耳公之意蓋因以為訓也既已三
命乃鄉飲酒則謝不往其出處大義迫斯可見雖曰未
學謂之學矣其斯以謂質行君子哉得其子而益顯也
長興徐公敬之傳

公名東始居約時游邑諸生間莫能厚遇久之授弟子
室里中非其好也則曰嗟乎大丈夫生不能遊大人以

成名即當效魯仲連布衣而排患解紛令千里誦義爾
終安能嘔嘔為章句師坐帷中日夜呻其佔畢從羣兒
取糈自食乎魯邑富人許公女年二十不嫁欲求賢夫
如公者公是時年三十矣乃脫身游女家女家素長者
里中少年多侮之即妻公又皆來侮 闕 問許公
豈負是屬而欲報之然此易高耳 闕 彼皆籍

吾家令我不維是子壻行皆魚肉之矣亡何微知少年
家陰事以令里中里中皆謂少年彼不上書告君即利

劍刺君矣少年家顧且因許翁奉百金願交驩公公乃以所奉百金益市牛酒更召外家宗人及里中父老曰高會數問其金餘尚有幾所趣賣共具曰里中少年豈不多豪然無奈此牛酒共具我何公既已脫遼陽大賈某氏之阨而某氏日操百金將進公及見公侍酒至暮口不忍獻百金邑有豪亭父朱某者好衆辱人公一日從旁數之曰朱君太橫哉朱乃瞋目視公曰客何為者居邑屋至不見敬於若乎乃太挫公公佯不問一日袖

四十斤鐵椎謂朱曰不聞信陵客椎殺晉鄙事乎朱跪
曰吾始以先生為庸人乃今知之遂相舉飲謝而去時
江南大饑斗米千錢而公門下多蒯縠之士然歲入實
不足以奉賓客至鬻宅子錢家不令知也公始與諸兄
同居及往許翁家諸兄皆聽公去不收十年之中公蓋
再致千金即諸兄匍匐來稱貸公又未嘗以無為解焉
公嘗謂何知積著好行其德者為亨利吾予人若棄之
假人若忘之即有償者是自實其義吾不忍為也公蓋

慕吳監門卒之為人而游於酒哉朋友相覲歡然道故
飲可五六斗而醉二三客前奏琴未嘗不為鼓一再行
而據地歌矣即長興令召公公又謝病不能往公雖布
衣然見邑中長老好問民所疾苦嘗謂長興西從方山
來可百里所故不多為陂誠得潄水高下更相受溉可
令畝一鍾何憂嘆哉城南諸田即患苦水暴至然以隄
善潰爾築令廣一二丈所何慮不障又可樹桑千畝因
掘地為池可養千石魚即雖汙邪且不失芟牧其中獨

奈何棄百世之利不為乎公既口畫縣中事縣長吏愈益重公門外時時以干旄來然其時民治渠少煩苦不欲也今年公七十有九矣尚善飯遇客無所敢失即有從季子中行來者與許夫人為夜灑掃早帳具至旦不倦蓋中行未遊京師所交已多大父行知名之士矣余為郎署中時中行嘗語余曰吾嘗諫家大人至篤行即所言邑長吏治渠事煩苦不為也以大人之義與邑中長老共數百頃田何不成也家大人謝曰吾聞興百世

之利以親附百姓者邑長吏之事也且吾邑長老居間者終不語今長吏幸而聽我我又奈何從邑中奪賢長吏權乎其為長者如此

杜長公傳

杜長公常者鄆人也以文無害試補奉化縣功曹在家時嘗稱詩貽厥孫謀以燕翼子曰信斯言也予幸逮事王父母又以勤父母子奚賴焉其為王父母供具一視父錫供具曰王父母固安大人供具矣所執王父母

喪父鎬無不如已自盡者而不知其所由辦也長公既收弟仲於維揚而為季有室以託姊子然後嫁從女者三如其女葬不能喪者如其弟仲筐篚賻贈至無暇日不為厭焉長公出入邑屋少年輒自避過而與之言則趨婦姑勃磳不出相閼亦自曰將謂杜長公何同曹掾某患疫諸曹掾舉以其妾故引去且止長公長公曰廢朋友疾病相扶持大義而借小嫌以自解何以稱同舍兄弟人孰無急難而坐棄之也每往必有所與俱執火

竟夕身傳七劑其妾顧以此無間處衆始服長公達節
云再補蘭谿縣功曹蘭谿令謂奉化令曰大邑多君子
今安得有杜掾其人哉奉化令曰其人故奉化功曹也
其取重如此先是長公值橐中裝於蘭谿之塗舉以微
亡者亡者至謂長公曰橐中裝都科也將輸縣而先門
假寐道左屬縣官出辟客倉卒遺之蓋五十金舉者遠
矣然此其地也長公曰此其地固在橐之豈遠乎即舉
以畀亡者亡者捐十金謝長公長公曰十金孰與五十

金爾豈以我無所置之也遽辭而往章公居仁嘗謂長公雖在功曹中質行不可及矣尋授廣西龍江驛丞有以藤自毒殺者其家誣怨家殺之郡太守謂怨家實殺之也以具獄憲司則移長公長公覆而輒見其冤狀太守惡其反也而笞之長公曰憲司豈少廉武吏而移之驛而乃撓於成案重辱命也笞之不猶愈於殺人以免乎屬征蠻之役幕府檄從軍疾作而卒於邸後五十年而孫思舉進士遷青州太府方為良二千石云

贊曰越之俗機賢者惑焉同曹掾疫長公不憚躬調護
之可與立哉及觀所畀亡者橐中語其調笑疏於叱詈
舉五十金若亡者自取之望望然惟恐得我又何可啗
以利也有是驛吏不難於不阿郡太守意有是憲臣不
難以殺人大獄屬驛吏者今無矣夫今無矣夫

晉陽王次翁傳

次翁子使君名道行弱冠擢進士給事尚書大司寇省
中余時為郎亡何使君補鄧州余尋出為鉅鹿郡明年

使君遷魏郡比二千石往來二御史臺若部刺史必直
使君與使君相勞也雅已聞次翁為人翁名尚智字哲
夫陽曲人嘗補郡弟子員不就以貲假幹掾省中十餘
年除薊之義豐驛馬驛於京師東北諸邊為孔道次翁
乃簿正厨傳箠使諸走約客至當御者往蓋三年所車
馬捷於羽檄使者應乎烽火未嘗一日詣對幕府矣再
遷北地之北峽關北漢障塞尉譏客出入明年棄官歸
太原屬使君已舉於鄉視笥中俸纔二金笑曰腆矣一

抱關吏何功於上也尋從使君鄧州使君問政未嘗為
質焉旁引成事而已及使君遷大名乃輒不敢復問政
曰吾何能從兒子輩數數操郡長吏事乎翁魁梧美髯
長者少不視產而長翁乃善賈乃翁撫長翁子則無不
若已出語人曰兄子某病吾則終夜不能寐然有過又
未嘗不譙讓之豈為第五氏哉即晉陽長老亦言翁倣
儻狀視仇家若不可解者卒如初不著於睚眦里中緩
急翁輒與居間然計畫之耳不必人人嘗施焉以故里

中曲聽翁請言事不願金矣余猶記使君在鄧嘗使人
於諸郡徵當候太嶽祠官者狀時詞官方貴幸余所為
候輒不與諸郡同人以報使君則使君從鉅鹿之所為
次翁屬在鄧也後使君從大名遷鳳翔太守移蘇州太
守禦倭於城下寇竟失利去稱治行第一云次翁雖不
視產即在驛塾諸驛在關塾諸關一日越人裴生者傳
過之罷矣翁輒竒焉延使使君卒業為之有室蓋三年
以裝去次翁所為使君亡慮十數師類如此以故弱寇

舉進士不十年三為大郡視曩俸筭中二金實腆矣廉吏何不可為哉余惟世之君子重與人為善也誠日莫途窮奪然後罷逐然後去斯笑之矣至無所為而棄官則又從而極之曰是先奪而圖罷先逐而圖去計之狡者也是計畫無復用之而竊輕富貴為名高者也是恐卒不可測姑以自避以緩人之跡我而將以復進者也不知計即狡亦徒為罷去耳身已隱矣安用名高愈避跡愈著夫又遑恤我後乎是三者故皆不出於患失何

世之君子重與人為善也余觀次翁棄官歸時年未五十一抱闕吏耳此三者何以稱焉

何季公傳

何季公者名積字良慶故姓徐系偃王後子孫稍遷歙之傳谿元末有萬億者始易姓何再遷休寧凡五世為兆義兆義生政景皇帝時用鹽筴起應詔輸粟塞下值虜大入猝獲良馬以免顧橐中裝百金耳乃即歸而廢著以復是瓦解之術也何以稱少有關智即百金不猶

當奇勝邪遂返塞下居數歲果再致萬金政生耀耀生
季公公生逮壯而伯若仲長已各倍公乃兄弟與俱徧
游江淮吳楚間所至雍容為閭里率相矜以賈咸謂季
公有家約也先是公父舉明經授長河丞公勸之往蓋
三年以循吏稱載在邑乘矣二兄之亡也公慨然曰曩
吾以愛弟奉二兄江淮吳楚間舉橐中裝託我我今乃
令諸孤無息業哉蓋終其身無私藏亡何御史君受寧
遠令又勸之往曰無念爾祖使我得稱長河循吏子更

能得稱寧遠循吏父乎自是寧遠君卒以卓異聞召拜
南臺御史也公因就南臺覘御史君所為治狀獨持大
體矣乃趣還休寧營萬安里而老焉縣大夫舉賓射必
迎公公彊為出竟不再然閭里耆功待公舉火者十數
家未嘗以居常謝客為解也公以季子金孺人以季子
婦得當父母驩公自折節伯仲間事如長河丞所何得
孺人亦以身下二姒事如姑汪如孺人所也其夫婦孝
友如此御史君上績書公與孺人同封年各八十有一

歲已孫五人曾孫四人矣御史名其賢今為南京某部郎中云

于鱗氏曰季公之賢也身治生而父若子皆以仕顯長河丞官薄耳其邑紀列焉御史貴倨矣輒謝雖賓射不再出彼竊借寵靈以炫閭里者何限乃季公所以先後父若子以仕顯者有道哉豈所謂得勢而益彰者乎惟孝友于兄弟子孫修業而息之所謂施于有政者也

汪從龍傳

汪從龍者歙人也名雲其先汪華者隋末以豪起據六州稱號吳王唐興授總管六州軍事歙州刺史封越國公至宋贈金紫光祿大夫叔敖者始自績溪徙邑之潛川叔敖生若虛於江南經制使若海為從兄若虛十二世生道壽道壽生十有八歲而其父士誠卒於客訃至輒往僦而輓以行盡僦乃焚櫬裸諸櫓錫相襲也橐而負渡江乃中流有光屬於舟龍輒夾繞舟舟相覆者數矣衆計無所出則徧索舟中諸非常物為解有髮几澤

可以鑒者十具以沈猶是也有丹沙煥如燦火者一斛以沈猶是也而衆愈益恐時道壽偃伏莫敢動即再索舟中念與櫓俱沈耳尋失光所在汜濟衆弗察其所負者枯骨矣道壽生庾應庾應生政和令賢賢生文暎文暎生從龍從龍家自道壽以來四世同居從龍嘗為叔文暎行質子錢家治其婚既已責遂并舉其母所遺篋中裝授焉緘識如故也蓋暎七歲而孤其父以篋中裝二千金屬文暎比授之日已十有八歲暎不知之也再

從叔晒議且異產而疑文暎私焉乃索四世所遺者四千金於從龍從龍視其遺實無金而衆愈益譟乃徐發其橐中書數劑以示衆某之產若干所某所之值若干金凡八千五百餘金人人倍其遺也衆復恐從龍却取其倍者輒舉抵於從龍然惡又不能二千金從龍曰先君子業已領家政而產幸人人倍今舉抵以難我不為先君子受此抵即公等何以明不私初道壽與其兄同產而兄輒自鬻於程氏擅不與值吳孺人請則引帀而

斷孺人鼻終不與值後程氏復以售諸其祖賢今所舉
抵故斷鼻之情豈論其不能二千金乎乃受抵而衆遂
異產蓋百有五十歲而後備四世之業以報斷鼻之怨
成孝子慈孫之志云嘗於京口夜夢僧而旦得鍾百金
易之歸而置諸邑時為郡諸生即守若令無不長者遇
之矣頃之以太學生為山東布政使理問嘗權稅太山
供客間太山館人各以其客自占至不敢匿一筭由是
不踰月而稅萬金上宮之役並計諸祠時以監者覆視

計簿簿構具諸祠凡數十所計杉竹數千值萬金乃盡
削之止計上宮構具署纔數十金而已屬有司行祠事
嚴諸工嘖嘖謂分作便也從龍固不許輒構上宮而撤
其構構諸祠凡數十所轉相為用即諸祠次第舉矣與
其分作而觀望孰若合力之致期是役也有程材無淫
物有稱事無譎工埏人為火齊瓦而塗焉諸家所不習
執齊上下漫無可稽從龍一日而得其技則相與謝不
敢為奸雖察察務得情然實無他腸歛俗儉視公費如

出諸囊中耳凡四年徙為益王府審理有五子各以一經為諸生云

李于鱗曰觀從龍自少與其父俱見苦為生雖家累萬金知財所從來及起為吏權稅太山行諸祠監者重有所棄計其幹裁不下鉅萬誠有所不能忍者也以是得意耳雖欲學吾術豈告之哉能試有所長非苟而已也

張隱君傳畧

隱君張冲者其先鍾離人徙金陵再徙吳門家世服賈

云隱君即嘗挾筴里中學一先生之言然畧大體終不
欲數數佔畢間弱冠往試視業則息錢恒什倍喜曰萬
貨之情可得而觀已然我則不暇頃之乃如京師與燕
趙游間公子為富貴容從諸佳麗人鼓瑟跕屣踰鞠六
博翩翩未厭也及觀宮闕之盛官儀之美與所交賢豪
間長者之游私且慕之曰所謂隱居巖穴之士設為名
高者安歸乎非深謀廊廟論議朝廷何以稱焉而胡為
失當年之至樂不自肆於一時蓋暮年屬父元平公病

則隱君心動趨歸家抵毘陵遇盜請橐中裝隱君懸橐
覆諸地顧主記記諸故人所齎問遺其家者某若干并
委之無怙色盜以君雍容睥睨故久立微察君君亦恐
有他謂之曰吾既已裝單橐舉矣無已迹將在眉睫焉
不腆千金由將不足以免之即逢蒙視詘要撓膺身質
以謝追吏小禮何所用而斫我為客則一何暴乎賊乃
引去君抵家元平公亦愈所記故人齎問遺者其家往
視君被創不敢問也君則自謂橐中亡恙矣然實已請

去創起視記償之為損千金焉乃益治產折節為儉與
用事僮僕同苦樂不啻若自其手指三十年間三致
千金嘗曰不時散失無所藏之以故身所嘗施若所已
責不可勝數然終不為德而少年附之輒爭為用屬有
天幸鬪智智勝爭時時會繇是兄滂弟津以儒術起而
隱君用俠聞矣居間田池之樂歲時祭祀進醵飲食被
服自通也起塾於家日洒掃治具度可供十人者使三
子侍酒於前庶幾賢豪長者適我哉晚尤好山水往往

在虎丘石湖間為厨傳廢一於舟廢一於車至即其方
返即其期蓋繇是不窺市井矣

李于鱗氏曰王生往為余談隱君家仲子獻翼兄弟故奇
士也久之仲子以諸君所為隱君者列傳言屬余余觀
所論次隱君者梅子真臯伯通之倫與亡論割股薦母
稱篤行君子即弱冠游京師自肆於一時斯亦誠理所
取焉烏氏保一鄙牧長今安得抗禮萬乘事及稱倭夷
犯郡時隱君傾身佐縣官之急以比於任氏之義公事

不畢不得飲酒食肉以為閭里率大體如此吾必謂之學矣日治具庶幾賢豪長者適我仲子故奇士其所由來遠哉

武母太恭人傳

武母井陘人姓畢氏處士宗伊季女也其先莒州學正忘其名以直言顯湖廣叅議鸞孝行表里門臨漳訓導居仁稱經師也母自以世家女通內則孝經大義歸邑處士用之遺腹三月而用之亡年纔二十有四既彌月

生子礪甫凡三十二年而礪甫舉進士除長清縣令入
為吏部主事凡十二年而母封太安人又三年遷郎中
而母封太宜人又一年擢太常少卿而母封太恭人是
時母年七十有一五年而王用三錫蓋殊遇也先是礪
甫在諸生中母年五十有司上言節婦狀先帝命表母
里門矣攀龍曰余觀程嬰杵臼之烈殺身相勸也託孤
為難焉一寡婦人而提六尺之孤義不辱則毀髮膚以
杜求者無已感慨經溝瀆自謂永訖計畫無復之耳無

論形虧而行立之為無以自全即身亡而孤存亦為無以自免也受其孤而使有所不可知猶為重遺之矣既阻薦饑匍匐拮据更依父兄輒貽不淑天所不能奪也衆方用暴以孤為辭是非示之以有累之形而誨圖之哉將何所不至也乃武母故自有母才云礪甫入為余言母家代自有節婦蓋其天性也

錢塘節婦凌太安人傳贊

以余觀於凌太安人何世之論節者之固哉可相勸而

成也可相勸而成亦可相靡而敗烏在其為天性哉方
太安人撫遺孤纔五月一老姑相依至戚也姑而姑諷
更嫁之諷更嫁之矣值歲凶復不能具饘粥共養如姑
意罵詈日滿室曰婦何家不可居而自苦若是如就嫁
之者不嫁也日所恃族長者而族長者諷更嫁之作使
豪奴益肆侵侮惟產之睥睨而藐諸是圖危矣不以扶
助德美為華寵也曰婦何家不可居而自苦若是如就
嫁之者不嫁也孰不愛女太安人尚亦有父在父而父

諷更嫁之至令踰年廢歸寧禮以自絕而猶未置焉往
曰女何藏之深也則操挺刼之至令頭搶地觸几案血
流被袞經而猶未置焉至今斷髮毀形以相視有父而
悖若此者乎曰女何家不可居而自苦若是如就嫁之
者不嫁也人情為其子以婦為其子之孤以婦自為以
婦而姑不然矣人情族有孤收之以其母有婦庇之以
其身而族長者不然矣人情欲其女有令名亦欲已有
令名於其女而父不然矣是三者所遇皆非人情太安

人可以影響自解何家不可居何家之無姑何家不可
居何家之無子舉產而授族長者屬姑焉委之以不可
知之子而且令父自絕於所適何負夫也難者曰姑且
老可竢貌諸之謂何則季子業以孤寄之矣曰是猶相
勸而成也三者所遇皆非人情而太安人卒能事姑立
子今聖天子明下詔厥高行見褒朱轡而守建昌者孤
邪是靡之而勿敗則非可相勸而成明矣今謂太安人
自存以存其子太安人假無子將為一訖計乎勸之勢

緩靡之勢急緩急非所論此余所以謂天性矣故語節而待子無以處夫無子者也

滄溟集卷二十

欽定四庫全書薈要卷一萬七千一百四十四

集部

滄溟集卷二十一

明 李攀龍 撰

墓誌

明故中憲大夫陝西按察司副使江君配恭

人郭氏合葬墓誌銘

君諱濬字子泉蓋梁散騎淹之裔有諱湖者自棗強徙濟南西門外負郭巷方水而居焉至今稱江氏之池云湖生秀復徙城東四十里許杏園因占籍厯城

秀生太學生得辛得辛生洽洽生璘璘生燦燦娶任氏生君君生十八歲為邑諸生正德己卯舉於鄉嘉靖乙未授直隸真定縣知縣縣有點少年衷石橐中而假宿館人旦發其裝佯驚謂曰是安得竊吾金而易之石乎獄且成館人笞掠無所得君至輒鞠其金所從來曰舉諸其子錢家備引子錢家無應者少年遂伏罪而君稱神明矣凡四年以薦疏十有三徵為四川道監察御史從幸承天除道潯沱河檄有司造

舟為梁覆土其上列檻屬之而大駕以渡蓋自知縣
時腹畫如此明年巡按隆慶劾奏大同總兵江桓下
吏虜再入寇遂皆以捷聞賜俸一級衣四襲銀若干
兩明年巡按應天奏罷府尹洪某及奏池州知府柯
某與撫臣異狀奪俸二月以南臺御史奏解遷太原
府知府者三年以奏最贈父如其官母太恭人先是
晉宗人其祿以萬數將軍中尉而下躬自簿計郡庭
紛不可問君為之約曰使我羖馬一宿有蒔藏詰朝

相見也自後宗室干謁是懲而仰給自遂至今便焉有聘女而其子甲卒者欲以妻其子乙其女既已改適則誣以為聘者乙也而訟之君微得其情命以後壻之聘三十金償前壻家協矣及逮按察使則奪以與乙其女而致今夜縊衆蓋蓋直君有其子不孝以屬君欲殺之則箠而示之病不一也乞原則又謬為不可者以數苦其慈而重貽之德久之乃釋其子卒為善士又謂君有仁術類不可測如此云又三年遷陝西按察司副

使整飭洮岷邊備凡一年歸濟南凡十有五年而卒蓋
嘉靖甲子七月二十有四日也距生弘治丁未十二月
二十五日得年七十八歲恭人郭氏泗州同知夔之女
年二十二歲歸君贈太恭人之年封恭人封恭人之明
年卒於官實嘉靖戊申九月二十九日距生弘治辛亥
八月十七日得年五十有九君嘗語人曰恭人歸我蓋
三十八年盟櫛未嘗干日也子男邑諸生如錦一人孫
女適郭維藩者一人適鄭申者一人先是恭人自太原

藁葬郡城東七里鋪南某年月日葬君於杏園祖兆東
南五十步恭人就祔焉蓋用君所自卜兆云志曰今之
君子患自視太淺矣君蓋起家縣令入拜御史再按畿
內以軍功受賞上書言事唯所論罷仕官至二千石出
守大郡遮留踰代分梟西檄秉憲一方不可不稱得志
焉嚮令實無所長徒芥蒂一第沮於自効謂不可覲非
常之遇於繩墨之外而槩人以不廣何以自見如是哉
是為銘銘曰

莫致之其孰寔之莫畀之其孰寘之是器是容是幟是
從寧踏焉是託勿適焉是獲約不劑能格不制才庶有
聞於將來

明故中憲大夫陝西按察司副使范君暨配宜
人楊氏合葬墓誌銘

按崔子元吉氏狀君諱琴字孔和其先晉士會之後蓋
武文宣獻以來子孫蕃衍於齊衛間矣元末有名思溫
者自東平避亂於郡之天馬山因家焉是為濟南始祖

云思溫生常常生整整生勝勝生福贈君福要馬氏實
生君君生十餘歲讀書於芙蓉山嘗有二龍窺頭於牖
抱尾於堂者諸生咸辟易走君不動但曰我獨何覲焉
頃失二龍所在諸生繇是咸竒君亡何復聞天樂作雲
中聲殷於庭諸生不聞也君乃竊喜益自負年二十二
舉於鄉壬辰登進士第選庶吉士明年以贈君喪歸已
未起家授翰林院國史編修修宋史校皇祖御製文進
經筵講官明年上昭聖慈皇太后尊號得贈贈君編修

戊戌分校天下士明年謫開州判官身勦巨寇安自強
之亂量移大名大名有段生者報笥發焉金也輒斥使
去門下而郡中廩廩矣尋擢南京戶部主事歷員外郎
郎中乙巳入賀遷四川布政使司叅議護上川南道治
雅江上游並大度河古流沙之域先是都蠻之叛守臣
檄兵討焉輒為所抗君至乃罷討都蠻兵身以朝廷威
信往諭之都蠻皆稽首謝請內屬如故庚戌再入賀遂
拜陝西按察司副使分巡西寧道明年屬征羌兵既出

道遇暴風起於車東入於其西謂諸將曰是何祥也羌
豈舍掌吉而就紅厓乎乃趨紅厓羌果至迎擊之大破
其衆二月晦復戰於紅厓斬其酋長九人八月又與戰
戮其酋長寫爾定數輩而羌平屬北虜旁塞君欲乘餘
威驅之乃遣百戶李堂齎牛酒往風其王俺答不亥曰
君移部乃直武威直武威厭人邪將遂欲與諸羌豪合
也使者乘障出士卒候望寒苦久勞君無益天子神靈
諸羌豪先後既授首幸不屯備南山即所請朔方騎士

亡慮三萬人尚在此張掖武威驍卒萬人羌降兵萬人
不合將焉置之量君所部不滿四萬耳孰與漢卒彊也
即諸羌願合陋中豈得入豈得從枕席度虜乎虜無以
應明日獻馬十匹謝頃之君輒出莊浪則虜在焉然業
已疑君有伏兵則走黃羊抵黃羊則君在焉虜乃引去
壬子虜更寇三川君將兵三千人往禦之復破其衆於
紅崖是役也斬首數十級并斬首騰狼台吉諸將益服
君多筭云事聞尚書上其功未報明年以他奏報免其

官家居十餘年而卒宜人者處士瑛之女贈贈君之歲
封孺人君為郎時贈宜人宜人生十九年歸君歸之日
君舉於鄉已兩月矣自以不得裹褐事君子蓋終其身
無間言君自為宜人誌今不具列焉君卒嘉靖壬戌七
月十二日生於弘治甲子十月一日宜人生正德丁卯
四月二十一日卒於嘉靖丙午二月十七日子一人時
棟郡諸生先娶金氏蘇州知府城女繼娶王氏某州判
官寵孫女女四人一適應州知州馬應奎子班亦郡弟

子員與時棟俱宜人出其許聘舉人耿尚文子熠某縣
學訓導表霑子夢庚廣東道御史薛樟子耀者封宜人
李出也孫女一人王氏出未聘卜某年月日合葬於紫
青山之陽余往在關中聞邊長老言君所起湟中塞百
四十里稱累世功紅崖之役先利致敵再策羌虜一何
雄也向令以一儒臣卒謫去何以自見乎猶復制於脣
舌尚書報罷竟免官去是鞅鞅耳贈君善堪輿家言實
荒芙蓉山徙焉豈法故當叶龍祥哉是為銘銘曰

孰是倚而伏之孰是踦而復之與其絀於口也寧絀於
虜絀於虜猶可禦也絀於口不可詛也

明故奉政大夫涇王府左長史張公合葬墓誌
銘

是誌也公蓋已葬者四十五年於茲矣隆慶庚午太學
生子含以父教授君卒屬誌於郡人殷大宗伯得請而
謂余曰先大父之謂何而不肖何敢不以先父望疇者
為先父望君幸追誌之也余若以為世德大誼遠而不

置猶之難已誌焉誌曰公諱齊字宗魯其先定州人元
末有高祖敬中者徙厯城敬中生獻舉永樂辛卯鄉試
仕南京後府經歷獻生諒郡正術贈僉都御史諒生鼎
舉成化乙未進士仕右都御史娶翟氏封恭人成化辛
卯十月四日是生公云年十六為弘治丙午屬都御史
謫從之彬州歸補郡弟子員舉乙卯鄉試己未卒業大
學正德改元都御史為逆瑾所構又從之獄索餽愈益
謹戊辰遂不就試太宗伯明年恭人卒又明年都御史

卒癸酉乃謁選授金華府同知矣俗故健訟公先繩其枉者片言伏之株連立遣苟得其情代贖頌繫虛圈實贖餘姚李江者與其叔虎殺父之妾而無毒迹公佯言曰聞此妾尚少安得白髮乎及檢鬢然視之髭也蓋掘他屍以命所毒者衆遂稱神明凡再攝衢州嘗一日傳爰書十三事記委旁午舟車之跡交於兩浙嘗督兩浙會計即會計兩浙自當臺省愈益賢之丁丑上績進階奉政大夫己卯攝行覲事辛巳宸濠之叛公屯於境上

草萍塞禦馬嘉靖改元滿九載且行過潛見築甬道長
竟縣者公為白臺省罷其役亡何遷涇府左長史涇府
實始封王相以下尉卒數千人給廩無常時公至白臺
省一旦為給廩者三年尉卒乃復有固志乙酉十月二
十二日公以脾泄卒即署教授君奉柩歸葬於郡城西
四里山祖兆云公娶贈宜人蘇氏陝西按察僉事泰之
女弘治庚申年三十二歲先公二十六年卒公誌其壙
繼娶封宜人秦氏嘉靖乙巳年六十五歲後公二十年

卒祔於公焉皆以公丁丑上績得稱宜人也公生三男
子汝椿即教授君自泰安王府改寧海王府娶壽張郡
主女沈氏汝桂太學生娶聰選官洪漢女汝南郡諸生
娶某州吏目周洪女二女子長適李時雍次適都指揮
彭烈皆蘇宜人出曰暉即子含曰皖麟遊縣教諭曰普
郡諸生曰曉曰著曰曾曰昱曰旦曰章孫男凡九人矣
秦宜人無出曾孫多不次云乃系之銘銘曰

孰是子而父罹而不可捄也孰是守而民罷而不可捄

也不宜其親胡宜其民三禩用彰于焉以藏

明開封府同知進階朝列大夫王公墓誌銘

公諱昭字孟宣其先棗強人洪武初五代祖士賢徙為
歷城人曾大父恕大父驥父福公生頗秀美顏辭正德
庚午偕計遊京師凡八上嘉靖壬辰領牧定州州畿內
都會地雜夷守無良去者公至更約法示誠信及旬而
善者安釐弊幾盡及月而獷悍息蜀生卓某者道定遺
百金之裝索之墜公曰第往當有守者至則守者一人

至生謂曰百金雖微不可攜而去乎曰人有棄子公嘗不忍為泣活之我即忍爾等轉於公之境哉梁御史來按部猝入獄惟二囚繫焉登上考去先是州田多汙萊人不能市牛耕公乃為孔明木牛法力得半牛在定三歲以狀公最者疏二十有二擢開封府同知會朱僊鎮盜起陷尉氏公即日往擊賊設伏扶溝下約舉幟翼攻之賊果嚮扶溝冒伏中遂鼓而捕首虜執訊以還公益微知賊家在扶溝必重質妻子也戊戌河決金相寺口

水出地上一丈所石橋歸德間方殫為河二洪置雍漕
粟不得從河上議者謂自孫繼口至清河口百餘里大
興卒塞之非十四萬人不可使領吏且六百人雜作治
河卒受平賈與伐買薪石之費期六月計十七萬餘緡
是時公實往治河往行河曰是在我即湛祭令水工表
獨以徒四萬塞茭而自蹈橈理捷事徒四萬亦勸赴市
百餘里雲舉各自以為常見公凡三月河隄成纔佐吏
數十筭九千七百餘緡而已績上賜爵一級視從四品

時行郡得金紫乘五馬輜馬而母夫人李且卒歸治喪
比禪亦懸車日弦誦吟嘯檢古書文帖泊如若忘其嘗
仕也公初工五言詩與劉選部天民名相及同郡邊公
貢稱兩生俱俊傑其在京師而陽信何景明亦善公即
雨雪逢人日江湖問客星搢紳至今傳誦之因知孟宣
名也余惟吾郡非不代有顯仕乃推與後進薦寵下輩
以是稱厚君子郡中士亦相與愛附公可謂與斯人徒
者矣即使徒致御相以尊大取棄絕卒老何足以易此

哉銘曰

孰與游者當世士牧則仁人儒君子六十樂天今已矣
公安此丘貽後祉

明封文林郎開封府推官汪公墓誌銘

公諱文顯字存道新安潛川人也其先曰汪華家績溪
為唐歙州刺史封越國公至宋贈金紫光祿大夫叔敖
者始徙潛川叔敖子若容若思從子若海皆舉進士若
海即嘗為江南經制使勸進康王者也十三世生彥仁

彥仁生汝珍汝珍生公公家世世服賈往來吳越間即
哀老復聽子孫修業而息之屬公早孤鮮兄弟彥仁公
乃不復欲公行則請行歸視息什倍彥仁公又欲公行
也則顧不為行曰計不暇席奇勝者不當如是乎及視
其所使則無不人貲相得轉轂殆百數賈郡國無不各
如其身往矣嘗貸故人胡輔三百金至試無所長欲其
術不告也胡且卒公亟置酒故人子令彊飲食謝不收
責且五年矣鬻地於汪循宗人所汝錫宗人則心欲之

若有怏怏移德於公者公謂汝錫今若是進而與叔父
地叔父猶無受也願以異日請治垣舍亡何汝錫持循
陰事以告公公為致前地也卒解免公齋用既饒恥溝
壑有期功之親宗族貧來售田即使田售宅即使居飲
食必自祝曰天苟有汪氏尚及無悔於予身公身自為
葬者凡四世嘗曰吾何能效邑屋中豪越紼從他縣爭
地以訟令殯者纍纍在堂寢而我哀經就繫逮吾生平
不讀相冢一字書也吳甲者嘗自鬻吳元家故冒姓吳

氏後與其主埒富乎吳元將殺之不解千金客曰以存
道之義爾何不令居間公既脫吳之阨固奴畜之乃暮
夜持金來卻之曰吾往即嘗為商賈之事何至於爾哉
此何異比部君在大梁為理時所聽杜給事事杜給事
殺人大梁中使裝玉帶明珠行公所公心知比部君廉
吏問遺不得至前則謂客曰即吾兒受賕不當致之大
梁郎中乎不去今且以爾往對簿論殺杜矣是時使公
藉令揚比部君名何不可哉乃大梁人愈益稱說公初

公年六十時會病以句曲山人楊君來居數月大愈體
復堅彊如昔時然一切不關家事矣乃謂揚公治生者
之於養生殊塗哉無論愚者多財為害即賢者稱明積
著之理始亦莫不走利如驚乃所樂觀萬貨之情一人
操息絀至輻輳此有知盡能索耳終不餘力而讓財精
神不愈散血氣不愈衰乎吾幸於前人得修業而息之
即擇人任時至道家所忌未嘗敢一日處知言哉公以
嘉靖戊申十二月十二日卒年七十有一歲配太孺人

方氏如孺人者一人張氏三子一貫郡庠生先公卒一
中即比部君余同年進士一誠國子生二人皆太孺人
出也銘曰

彊于宗家彌蕃兮恬于生身彌存兮尚亦有利于子孫
兮

明文林郎四川灌縣知縣周公叔大墓碑銘

公諱奕字叔大本姓劉氏其先寧國人六世祖達一者
生政卿始冒今姓政卿生德始以徙戍金齒家焉德生

晟晟生玉是為公父至老不識衡量嘗夢白象而詰旦
生公公生少不美長不謔也通五經尤長於春秋弱冠
為郡弟子員比有司大張樂送之學宮公獨乃先往郡
太守異焉嘉靖戊子與計偕乙未以親老不赴大宗伯
頃之而公父果卒戊戌除灌縣令縣瘠土又當威茂二
邊餉道公攜二蒼頭之任曳革履一兩耳食無兼味有
餽之餌云可化為黃金者公舉以投諸江灌大夫以公
無家客甚久飾美女遺之不納也臺檄歲報贖金視多

寡上下其考公曰是使我剝民以稱最何不至哉即有
事他邑單騎從之見者以為簿尉矣其天性儉素類如
此灌既治改雲南府學教授蓋公以母唐老不能就養
得請也歸之日有以十贏為公裝者目之乃前所理太
辟囚某也公遽曰申冤令職也以若所為是市之矣改
官改行邪且吾二蒼頭鼓篋自喜十贏安所用之然唐
孺人猶未欲詣雲南公時時取給便省矣凡九年門下
士嚴公清郭公斗輩彬彬起矣屬當報績京師公曰吾

遠灌為母也遠者歸矣歸者更出乎遂拂衣去先是學
官使者太宰吳公簡諸生而授公公之子紹稷與焉屬
以雋且既廩而吳公輒遷代者有欲於公而公意不與
之紹稷辭既廩矣喬生既廩既用修於公而生亡公則
反之也諸生某延公而見其妻公怒罷酒皆謂公古師
儒云余惟古語有之唯色毀廉公無家於灌而卻美女
與拒諸生之見其妻也物莫有能動者矣今之師儒不
稱腐而稱豎其事監司之臨學官者何不至也且人亦

孰不欲其愛子之成功名至今不得隨牒既廩也戚矣
寧中廢業而意不為少假以傷不阿之誼豈不謂古師
儒哉母氏之故九年不哀屬堂上績拂衣而去茲與其
父老為不赴大宗伯一也功名之會難語天性其然哉
汝寧徐使君嘗為余言周真陽賢余視海浙中見真陽
在學官中得為公具列之如此公生弘治己酉卒嘉靖
丙辰配陳氏子一即紹稷故真陽令寧波府學教授娶
王氏女二適張轅馬必昌郡諸生孫男二思兼娶潘氏

思永娶胡氏孫女二適莊東王廓曾孫男一曰厯是為
銘銘曰

懿厥弟子張樂學官嗜音之戒養正于蒙爰及令灌革
履跣然孰其在御二奴比肩投江之餌可為黃金與彼
美女無貳爾心徭無異邑匹馬是將行無改官始節是
裝師儒之求匪修乃承譽髦斯士接跡同升監司孔臨
抗言用違維母之故已而逆歸真陽世德永以為儀克
咸厥家有繹其辭

明將仕郎趙君墓誌銘

君諱應奎字子徵其先東強人國初有十四者始徙厯城十四生七七生榮榮生通通生樂樂生強強生四子君其長云始君之以長史功曹掾除壩上倉大使也客有過而勞焉者君則謂客豈以倉令則已卑邪吾猶為之凡以可因分自致耳是役也實單車之壩會計惟謹束橐較於輿薪執概不爽釜鼓然奉已薄輒取給家原用諸弟轉穀歲餉之矣居一歲改小真村巡檢屬有劇賊

阻聚松徐間諸二千石不能禽制則檄君捕之君乃率卒往遇賊輒格鬪俘乃十數輩賊益悉衆拒我君卒不及賊三之一遂為所獲坐君於中直兵在胸句兵在頸環而視之不動也已乃從容為陳說利害曰固欲其安之也賊亦尋解事聞諸二千石無不壯君之為人者績書交最不次遷矣亡何輒棄官歸濟南則長君世卿舉於鄉之歲也君纔年四十八客有過而止之君又謂客吾已試為吏無卑者去不為吏無少者今何能亡除壩

上倉時相勞語邪歸三歲隆慶改元四月九日終於正
寢以生於正德丁丑十二月二十二日得年五十一歲
配姚氏子一人曰世卿娶孟氏女二人一許聘王閎玄
一許聘王侍講孫男一人曰勉學女一人未字卜某年
月日葬郡城東祖兆次誌曰信乎吏之無卑也壩上之
役東豪釜鼓皆朝廷一倉令執槩軍國持平分可自致
效卑成尊坐於賊中環視不動苟可安諸郡見危授命
生而有所不用而後能用其生也孰與陳說利害使之

自解之為從容君子曰解官之難於解冠也不能坐於
賊中而能一朝長往邪奚自致有二也按狀君蓋既棄
官歸之日宅不更隣田不更畔身與太公恬焉顧所為
諸弟奔走徃賦者不以疲於棄官自諉可謂孝友為政
克明大誼者哉結髮諸掾積歲試為吏一朝棄之無論
其年可以為難矣余聞之殷少宰從游之士以長君則
吾門唐子高焉蓋稱舉德性今觀將仕君之為人所繇
來遠矣是為銘銘曰

孰尊是須而卑可踰孰安是漸而危可罹行之既舒止
斯有餘分不常在天自致則然曰君子之阡

明太學生聶君以茹墓誌銘

君名鑑以茹字其先長干人也蓋曾大父士誠始遷曲
周焉大父文以高年起民間賜爵一級父景巖為郡功
曹時則生君君為兒時嘗問母郭氏即兒年及母母奚
若哉曰是時爾且以藁裡掩我地下矣君遂號泣終日
不嬉戲弱冠以貲入為太學生蓋兄事唐山馬健弟畜

渭南李文進之屬相與抵掌言天下事矣識者以謂即
以茹彊仕何國家不可為及被徵詣京師則又見今所
謂賢者卑疵娥趨以得人情惴惴焉猶日懼以冒於罪
罟無不包藏機心狙伺事會此非夫色厲而內荏者邪
吾即何異於鹿豕又安能效騏驥局促轅下乎將仗尺
綬以範我馳驅也是豈其意哉初豈願以其貲賈患也
輒歸不復語仕進矣君性好施予即母外孫趙氏者母
襁褓之功也嘗以謂君君曰此其田二百畝趙氏何憂

孤乎以余觀於以如山居耕田而得食不賁羽儀矣起而為吏身諛佞者寵利行不恤鄙夫身雖汙辱哉用居上為右試官又恐比周賓正為姦觸大罪怨及朋友諛佞安可為也念為婞直奉法不阿動忤衆枉行危而毀成倖直安可為也是則以如哉銘曰
君子之屯以保其身有孚於哲人兮

明處士襲公墓誌銘

處士諱彪字仲威少時嘗為縣官輸租廣川主計吏以

輸者填委謬署處士牒以捐之遣令去矣處士竊念生平義不逋賦稅即一旦出門輸租縣官何可輒令有離上抵負名乎竟自請輸租也久之又為縣官輸租詣京師見遺錢百緡於道中經相屬也稍稍致之車中而逆旅人意且私之矣乃謂處士持錢百緡猶為暴藏孰與易之金而橐中裝焉便也逆旅人固進處士固謝乃馳及前遺錢百緡者視錢百緡亡其車中處士下自致之曰貫得無朽哉輒起乘不顧而去豪長者馮甲嘗假處

士宗人粟三十斛矣處士不知也而宗人自馮所來言收債事處士曰吾即不能贍其族雖有粟降之天猶之露食也且馮君不難指囷授爾何可使失要期乎乃為具三十斛粟償之馮亦不知為處士粟矣嘗謂諸子非其命求無益於得即當饜糠覈奈何欲啖麥飯亦卒然喪失著覆地上爾不然軟軟吡吡口約腹裁雖一錢捫之汗出不能去手老至操財愈急其不才子亦已視產稱貸恣飣麗游飲詬笑乃翁纖嗇作苦宛其逝矣即倒

囊入息於子錢家甚者卒失業市乞轉溝壑令里閭咄然相戒寧極慙於生前耳吾豈嘗不慮及是乎處士侃侃性尤不喜巫祝嘗謂不盡此輩焚之天終不雨已則惰不力穡而徒以禳田哉不已疏乎是為偃姬跛媼疾廢之婦以馮身孤祥厲鬼而頻行為祟者彪安能以八尺軀磬折於前甘令其恐喝數切不敢仰視已而操吾豚蹄斗酒以往哉由是普濟之東巫祝女子凡以其土偶若桃梗人遷者數十家矣處士其先東強人六世祖

諱全者始徙章丘焉而成而士達而彥祥而子整而昇
昇即處士父也處士生於成化四年三月十二日歿於
嘉靖三十四年六月二十七日妻五人子四人孫男九
人蕭氏生曇一人曇之子光燦史氏生昆與勗二人昆
之子光燿光熠光焰勗之子光炳光煥其冕一人生子
曰光炫光煌則又一蕭氏出也其次魏氏賀氏及女二
人曾孫男若女十二人不具其所自出焉勗實處士家
季子哉所為文章稱博辯君子余弱冠與游甚驩既猶

與光炳光燿處諸生中也其年十月十二日葬處士於蟠虬澗之陽以許邦才所狀示攀龍為之銘銘曰
不啗於人寧聽於神宜爾子孫振振兮

明故許處士配張孺人合葬墓誌銘

許氏其先棗強人也有諱伯成者始徙厯城云伯成生
本本生敏敏生瑒是為處士父處士既總角受大戴禮
補郡諸生矣則寢疾者數歲瘳而母陳更寢疾則更受
素問難經諸方書而母陳疾亦旋已處士雖好數然慕

張子和之為人自言時時以其三法者視人無失也每為長史君稱黃老家言慈儉不敢為天下先吾用之且四十年而匿迹自隱不敢以其伎成名矣初處士弟鑑家有巫視病者處士實懷利錐往會之至則屬其從弟子女數輩曰何累累者腓乎有鑑在此蓋踰日竟無降者相與辟睨處士也處士乃出其錐謂曰神固當患若此哉不腓魚菽在此其以歸矣不然徒敝鼓也蓋自是諸許氏無復謁巫者處士之力也張孺人宣之女也生

十六年歸處士處士兄弟七人婦皆名家子人人無不
自以為視具工乃姑陳則數過處士食徒以為所進必
所欲也陳故時時寢疾即加一飯脫然愈即損一飯脫
然愈孺人視處士之視母功常居半焉長史君既調永
寧孺人謂曰男子之建功名周旋惟四方何可欲更得
如趙州者在爾宇下為善地又何得以我老為解即不
行所為嘗爾者豈更憐爾而遂以一蹶已使甘心我乎
及遷今官孺人即又謂長史君在永寧時孰與今官親


者親責之故者故望之宗族鄉黨遠於萬里又安得以
我之故稱便也蓋自是長史君益莊而官屬益畏矣至
今諸許氏皆謂孺人相夫不於處士或以其母或以其
子云余惟處士懷錐事大類西門豹故談笑足以移風
俗雖長者為之又使當之永寧時非孺人數語引大體
長史君安能慷慨萬里也處士字待時鉉即其名生於
成化八年正月二十九日以嘉靖七年六月十一日卒
孺人少處士三歲六月二十三日生卒以嘉靖二十八

年十一月十九日子一即長史君邦才也孫復郡諸生
卜三十九年三月六日城南某村之祖塋改兆葬處士
而孺人與合請余銘銘曰

胡既以慈儉不敢為天下先又胡欲託於四方以周旋
弗匿弗章弗蹶弗行子孫振振有懷二人哉



滄溟集卷二十一



總校官庶吉士臣侍朝

校對官庶吉士臣瞿槐

謄錄貢生臣王嘉稷